



Inatsisartunut ilaasortamut
Jens-Frederik Nielsen
Demokraatit

Uranimut inatsisip sunniutai pillugit § 37 naapertorlugu apeqquteqaammut nr. 164-2021-mut akissut

07-12-2021
Suliap nr. 2021 - 20875

Asasara Jens-Frederik Nielsen

Postboks 930
3900 Nuuk
Tlf. (+299) 34 68 00
Fax (+299) 43 02
E-mail: asn@nanoq.gl
www.naalakkersuisut.gl

Inatsisartut suleriaasianni § 37, imm. 1 naapertorlugu uranimut inatsisip sunniutai pillugit Naalakkersuisunut apeqqutinik saqqummiussaqaqputit, taakkualu matumani akissuteqaqfigineqarput.

- 1. Nukittoq eqqaani Niobium-imik pilersaarut uranimut inerteqqutip aaliangerneqaqqammersup kingunerisaanik matuvoq. Tassunga pingaarnertut Naalakkersuisut qanoq oqaasissaqarpat?**
 - a. Uranip inerteqqutigineqarnerata aningaasaleerusuttunut kinguneqartussaannginneraanertik Naalakkersuisut aaliangiusimavaat?**

AKISSUT:

Hudson Resources Inc-ip ilaatigut Kalaallit Nunaata kitaani Kangerlussuup kujatinnguani aatsitassarsiorluni misissuinissamut akuersissut 2020-32 pigisaraa. Akuersissut periarfissanik pissanganartorpassuarnik imaqarpoq: Peqarfik niobium-itaqartoq aamma tantal-itaqartoq kiisalu uranitaqartoq (Nukittoq) aamma peqarfik aatsitassanik qaqutigoortunik aamma thorium-imik akoqartoq (Sarfartoq). Peqarfik niobium-itaqartoq (pyrochlor) pyrochlorip saffiugassartaani uranimik 0,01-1%-imik akoqarpoq. Tamatuma kingunerisaanik niobium paaanerup ingerlanerani uranitaqartinnagu piiarneqarsinnaanngilaq. Peqarfiit marluk taakkua imminnut avissaarsimallutik inissisimapput, taamaattumik peqarfiup aappaata uranitaqartup peqarfiup aappaani aatsitassanik qaqutigoortunik akulimmi paaanissaq mattutinngilaa. Pisinnaatitsissummik pigisaqartup akuersissutip ilaa aatsitassanut qaqutigoortunut tunngassuteqartoq, annertussusissanit akuerisanit annikinnerusumik uranimik akoqartoq, siunissami ukkatariniaraa, uranimut inatsisip nutaap malitsigisaanik pisinnaatitsissummik pigisaqartoq tamanut ammasumik oqaaseqarpoq. Taamaalluni akuersissutip taamaatinneqarnera tassani pineqanngilaq, kisianni

pisinnaatitsissummik pigisaqartup tungaaniit aatsitassarsiorluni misissuinissaq siunertaralugu aatsitassat allat ukkatarineqarniartut pineqarluni. Tamanna tunngaviatigut aatsitassarsiorluni misissuinissamut pisussanut pilersaarummut pissusissamisoorluinnartumik ilaavoq, tassani paasisat imaluunniit inatsisit pissutigalugu pisinnaatitsissummik pigisaqartup pilersaarutigeqqaakkaminik malersueqqissinnaanngippat, piffissami aatsitassarsiorluni misissuiffiusumi aatsitassarsiorluni misissuinermit siunnerfiit allannortinneqartarlutik.

Aatsitassarsiorluni misissuinermit suliassanut ataasiakkaanut sunniutaasut takkussinnaasut pillugu uranimut inerteqquteqarnermut atatillugu tunngavilersuutigisani Naalakkersuisut aalajangiusimaannarpai, aammalu suliassaq taaneqartoq taakkua ilagaat. Taamaalilluni oqartussanut imaluunniit pisinnaatitsissummik pigisaqartunut tamanna tupaallannartortaqaanngilaq.

Taamatuttaaq inatsisit nutaat qanoq suliassanut ataasiakkaanut sunniuteqassanersut, pisinnaatitsissummik pigisaqartup tunuliaqutaasa apersuinerat pissusissamisoorluinnarpoq. Pingaartumik aatsitassarsiorluni misissuinermit siunnerfinnut tunngatillugu urani pingaaruteqarsinnaatillugu. Naalakkersuisut tuluttut paasissutissat uranimut inatsisip piffissami tusarniaassutigineqarnerani nassiunneqartut saniatigut, aamma inatsit nutaaq pillugu tuluttut paasissutissanik nutartikkanik piaartumik saqqummersitsissapput.

Inussiarnersumik inuulluaqqusillunga

Naaja H. Nathanielsen

Naaja H. Nathanielsen